

Bosna i Hercegovina  
Federacija Bosne i Hercegovine  
Srednjobosanski Kanton/Kanton Središnja Bosna  
KANTONALNI SUD U NOVOM TRAVNIKU  
Broj: 06 0 K 002413 21 Kv 2  
Novi Travnik, 28.09.2021. godine

## U IME FEDERACIJE BOSNE I HERCEGOVINE!

Kantonalni sud u Novom Travniku, u vijeću sastavljenom od sudija: Mirjana Grubešić, predsjednica vijeća, Zuhdija Ćosić i Suada Kahrić, članovi vijeća sa zapisničarem Slađanom Dujo, u krivičnom predmetu protiv osuđenog T.R. zbog krivičnog djela Razbojništva iz člana 289. stav 2. Krivičnog zakona Federacije BiH i dr., odlučujući o Molbi ovog osuđenog za izricanje jedinstvene kazne po pravomoćnim presudama Kantonalnog suda u Novom Travniku broj 06 0 K 002413 10 Kv od 15.07.2010. godine i broj 06 0 K 010443 17 K od 14.05.2018. godine, na sjednici Vijeća održanoj dana 28.09.2021. godine, donio je sljedeću

### PRESUDU

Kazne zatvora izrečene osuđenom T.R., pravomoćnim presudama i to: presudom Kantonalnog suda u Novom Travniku 06 0 K 002413 10 Kv od 15.07.2010. godine, kojom je osuđen na jedinstvenu kaznu zatvora u trajanju od 3 (tri) godine i 7 (sedam) mjeseci i broj 06 0 K 010443 17 K od 14.05.2018. godine, kojom je osuđen na kaznu zatvora u trajanju od 2 (dvije) godine, uzimaju se utvrđenim, pa se T.R., na osnovu člana 54. stav 2. tačka b) Krivičnog zakona Federacije Bosne i Hercegovine i člana 340a. Zakona o krivičnom postupku Federacije Bosne i Hercegovine,

### O S U Ā U J E

na jedinstvenu kaznu zatvora u trajanju od 5 (pet) godina i 5 (pet) mjeseci.

Osuđenom T.R. se, po članu 57. stav 1. Krivičnog zakona Federacije Bosne i Hercegovine, u ovu jedinstvenu kaznu zatvora, uračunava vrijeme provedeno u pritvoru po bilo kojoj od navedenih presuda, te cjelokupno vrijeme provedeno na izdržavanju kazne zatvora po navedenim pravomoćnim presudama.

U ostalom dijelu naprijed navedene pravomoćne presude ostaju ne izmijenjene.

### Obrazloženje

Osuđeni T.R. (osuđeni) podnio je dana 16.07.2021. godine ovome sudu prijedlog da se izvrši preinačenje dvije naprijed navedene pravomoćne presude ovog suda, kojima su mu izrečene kazne zatvora, a da nisu primjenjivane odredbe o sticaju.

U smislu člana 340a. stav 3. Zakona o krivičnom postupku Federacije Bosne i Hercegovine (u daljem dijelu: ZKP FBiH) zatraženo je da se nadležno kantonalno tužilaštvo u Travniku izjasni o tom prijedlogu, koje svojim aktom broj T06 0 KT

0020025 17 od 16.09.2021. godine se ne protivi prijedlogu osuđenog, predlažući da mu se objedine sve pravomoćno izrečene kazne.

Po razmatranju pravomoćnih presuda i odgovarajućih spisa, ovaj sud je našao da je, u konkretnom slučaju, prijedlog osnovan i da ima mjesta primjeni člana 340a. ZKP FBiH, što u svojoj Molbi traži osuđeni.

Iz spisa i pravomoćne presude Kantonalnog suda u Novom Travniku broj 06 0 K 002413 10 Kv od 15.07.2010. godine, utvrđeno je da je T.R., po nepravom ponavljanju po članu 54. stav 2. tačka b) Krivičnog zakona Federacije Bosne i Hercegovine (u daljem dijelu: KZ FBiH) i po članu 340a. ZKP FBiH, po navedenim pravomoćnim presudama osuđen na jedinstvenu kaznu zatvora u trajanju od 3 (tri) godine i 7 (sedam) mjeseci. Ova presuda postala je pravomoćna dana 05.08.2010. godine.

Iz pravomoćne presude Kantonalnog suda u Novom Travniku broj 06 0 K 010443 17 K od 14.05.2018. godine, utvrđuje se da je isti osuđeni zbog krivičnog djela Ubistva u pokušaju iz člana 166. stav 1. u vezi sa članom 28. i 31. KZ FBiH, pravomoćno osuđen na kaznu zatvora u trajanju od 2 (dvije) godine Ova presuda postala je pravomoćna dana 05.08.2020. godine.

Pošto je utvrđeno da postoje dvije pravomoćne presude po kojima osuđeni nije izdržao kaznu iz posljednje presude, a nisu primjenjene odredbe o sticaju iz člana 54. stav 2. tačka b) KZ FBiH, u odnosu na te dvije pravomoćne presude, to je ovaj sud našao da su u konkretnom slučaju ispunjeni uvjeti za primjenu člana 340a. ZKP FBiH i preinačenje navedenih pravomoćnih presuda samo u pogledu kazne.

Prema odredbi člana 340a. ZKP FBiH, proizilazi da pravomoćna presuda može se preinačiti i bez ponavljanja krivičnog postupka, ako je u dvije presude ili u više presuda protiv istog osuđenog pravomoćno izrečeno više kazni, a nisu primijenjene odredbe o odmjeravanju jedinstvene kazne za djela u sticaju, što je upravo u konkretnom slučaj, pa je ovaj sud, koji je izrekao obje kazne u ranije navedenim pravomoćnim presudama, kao stvarno nadležan u smislu odredbi člana 340a. stav 2. ZKP FBiH, ovom svojom presudom preinačio, u pogledu odluke o kazni, naprijed navedene pravomoćne presude i izrekao jedinstvenu kaznu prema odredbama o sticaju, sukladno odredbama člana 54. stav 2. tačka b) KZ FBiH i član 340a. ZKP FBiH.

Prilikom izricanja jedinstvene kazne, ovaj sud je uzeo u obzir sve okolnosti koje su ranije uzete i to kako olakšavajuće, koje su iznesene u navedenim presudama, tako i otežavajuće okolnosti, da se radi o teškim djelima, da je isti ranije već više puta osuđivan, pa da ni dosadašnji protek vremena ne umanjuje značaj i težinu ovih krivičnih djela, jačinu povrede zaštićenog dobra i ispoljeni visok stepen krivnje optuženog kao počinioca, te da ni sam osuđeni u podnesenom prijedlogu ne navodi nikakve druge olakšavajuće okolnosti. Zbog toga je ovaj sud izrekao jedinstvenu kaznu kao u izreci, koju smatra nužnom mjerom i za koju je uvjerenja da će u okviru općih uvjeta izricanja krivičnih sankcija ostvariti, kako generalnu, tako i specijalnu prevenciju kažnjavanja iz člana 42. KZ FBiH.

Na temelju člana 57. stav 1. KZ FBiH, osuđenom je u izrečenu kaznu uračunato vrijeme koje je proveo u pritvoru po bilo kojoj od naprijed navedenih presuda, te

cjelokupno vrijeme provedeno na izdržavanju kazne zatvora po bilo kojoj od tih presuda.

Na temelju izloženog i odredbi člana 340a. ZKP FBiH, a po članu 54. stav 2. tačka b) KZ FBiH, odlučeno je kao u izreci.

Zapisničar  
Slađana Dujo,s.r.

Predsjednica vijeća  
Mirjana Grubešić,s.r.

Pouka:

Protiv ove presude dozvoljena je žalba u roku od 15 (petnaest) dana od dana prijema iste, Vrhovnom sudu Federacije BiH Sarajevo. Žalba se podnosi u 3 (tri) primjerka putem ovog suda.